

## Idee muss merr hawwe

Omm letzde Sunndaachmoie omm Stommdisch hawwe merr widder emol iwwer unser Altstadt geschwätzt unn doodriwwer, was mett dere bassiern soll.

De Karl moont: Dess gonse Axthelm-Gelände, Norma-Parkplatz odder wie du, Honnes, saache dust, de Marienplatz, soll zugebaut werrn unn ess soll nor e paar Parkplätz dort gewwe. Dess iss awwer nitt rischdisch. Weil wenn isch merr dess vorstelle due, frooch isch misch, wonn ooner vunn dene Hohe Herrn im Flerschemer Rothaus ess letzde mol uff dem Platz gewese iss, onn emm gons normale Werkdaach.

Unn was hädder doo gesehe?, frooch isch de Karl.

De Karl druff: Was dort los iss, wennde mettem Audo druff willst, dess iss monschmol e gons schee Geworschdel. Die oone wolle druff, die onnern erunner, unn wies nor oon freie Platz gewwe dut, zack, fährt e Audo druff, doo werdd nitt long gefackelt. Isch frooch misch, wo die Leit alls hiegieh, awwer doo denk isch, doo sinn Geschäfte in de Näh unn zwaa Bonke, enn Dokder, enn Notar unn was waaß isch noch alles.

Isch saach: Monsche giehn aach vunn dort aus ins Schreibwargeschäft in de Grawest-rooß unn in de Brillelade, monsche in die Buchhondlung, unn der oone odder onnere leeft iwwers Rothausgelände ins Rothaus selbst odder ins Blummegeschäft unn in dess Reformhaus in de Bohnhofstrooß.

De Karl hott geniggd: Was heeßt dess alles? Mir brauche aach in Zukunft enn grüße Parkplatz in dere Eck. Wens den nitt gibt, giehn die paar Geschäfte, die merr dort noch hawwe, aach noch kabutt.

De Karl guggd de Schorsch oo unn weil der nix saache dut, moont de Karl: Doo hott emol ooner gesaad, solle die Leit doch ihr Audos unne onn de Moo stelle, die paar Schritt kenne die Leit doch laafe.

Isch saach: Vunn weesche e Paar Schritt! Ferr äldere Leit? Ei wenn die Stegge odder enn Rollator brauche dun, konnsde dene nitt zumute, die Owwermoostrooß enuff ze laafe, der Weesch iss steil unn long unn wenn e Audo kimmt, misse se sisch onn die Heiserwänd drigge. Naa, die Plätz omm Moo dauche nix deferr, die Altstadt ze redde.

Jetzt hott de Schorsch ess ersde Mol was gesaad: Heert emol, die gons Sache misst gons onnersders gemacht werrn.

Ei wie donn?, hott de Karl gefroochd.

Seet de Schorsch: Dess Flerschem iss doch suwiesu zwaagedeild, die Eiseboh deild unsern Flegge, doo kenne noch su vill Unnerfiehunge gebaut werrn. Also missde die zwaa Stadtdeile uff e Art unn Weis verbunne werrn, die Geld kosde dut, awwer die aach su doll iss, dass mir in Flerschem vunn Fachleit aus de gons Welt besucht werrn. Mensch, dess gibt enn Ufftrieb: Flerschem werdd Spitzereider in de Verkehrstechnik!

Unn, habb isch gefroochd, wie solle die Stadtdeile verbunne werrn?

De Karl hott de Schorsch oogeguggd, isch habb de Schorsch oogeguggd, unn gons gesponnd hawwe merr gewadd, wasser jetz saache dut.

Unn donn seeter aach schunn: Idee muss merr hawwe. Merr misse e Seilbohn baue, vumm Moo uff de Marienplatz unn vunn dort enaus in die Kolonnade, hoch iwwer die Dächer unn su stabil, dass aach alde Leit dort mettfahrn dun. Isch habb schunn oogefonge ze basdele, unn in e paar Woche due isch eisch moi Modell vorfiehrrn. Was moonden ihr doodezu?

De Karl unn isch hawwe uns oogeguggd. Mir? Nix, mir sinn sprachlos.

Eiern Honnes

ebb\_319\_552563687\_3494670730.doc